

Exame-Fier 2023

vum Heinz-Georg Bauer

Hügg em Kölsche Boor zo fiere un Kölsch zu schwaade,
do bruch mer hee dise Owend nit lang drop zo waade.
Et gitt noh däm bestandene Exame kein Halde mih,
kein scheive Sätz weede formuleert un dun en de Uhre wih.

Mer hät met vill Freud en dr Akademie studeet,
op flöck ov höösch – alles ganz ungeneet.
Och Stadtgeschichte, Orthographie un Grammatik pur
woodte gepröf – dann wor et zenöchs geschaff – dat Kölsch-Abitur.

För et Kölsch-Exame kunnt mer wähle,
dun ich mich met Sprochgeschichte, Literaturkund un Bruchtum quäle.
Oder litt mer dr alternative Zweig ihter mih,
do liert mer Konversation un Kölsch schriefe met Aki.

Wann nohm Kölsch-Exame un all däm Brass
et Studium aan dr Akademie mäht immer noch Spaß
un et ene nit losslööt dr ganze kölsche Krom
dann ka’mer zogoderletz noch maache dat Kölsch-Diplom.

Üvver bekannte Lück, de Veedel oder söns jet Interessantes vun Kölle soll die Arbeit sin.
Allein oder och zesamme met andere kritt mer dat en zwei Johr bestemmp god hin.
En dr Bibliothek vun dr Akademie ka’mer en Hääd Diplom-Arbeide beluure.
Leev examinierte Kölsche: Hat Phantasie, maht üch op de Söck un dot jetz bloß nit muure.

Mer hät ävver och gemerk bei all däm Wesse,
Kölsch es en Hätzensaach un weed vill am Gefühl gemesse.
Su schreev dr Philipp Jansen dat Folgende op,
et es zwor ald, ävver et geiht einem nit us däm Kopp:

„Kölsch es de Ääd, der ich entsprung,
Kölsch es mi Hätz,
Kölsch es ming Zung!
Kölsch wor mi eeschgesproche Wood,
Kölsch klung dr Mutter äänste Rod!
Kölsch wor mi Vatter,
Kölsch ben ich,
Kölsch föhle all ming Kinder sich!
Kölsch es mi Huus,
Kölsch es ming Kirch,
Kölsch es die Ääd, die mich ens birg!“

Esu e Gefühl weed mer nit mih loss,
nit doheim un och nit op der Stroß.
Kölsch levve un föhle, dat weiß ich genau
deit mer bei de Fründe vun der Akademie för uns Kölsche Sproch e.V.

Do gitt et Schmölzer, et sin 7 aan dr Zahl.
Ov mer bei einem, bei zwei oder bei se all metmäht, dat es egal.

- Chor
- Theater
- Ströppche-Klaaf
- Verzällcher
- Wanderunge
- Föhrunge
- Stammdesch

all dat ka'mer maache
un et weed Kölsch geschwaad, et gitt och immer jet zo laache.

Et Theater-Schmölze bruch jet fresch Blod, Kääls un Fraulück,
denn die opgeföhrte Stöckelcher bränge däm Publikum ärg vill Glöck.
Em Senioresteff kütt mer besonders god aan,
do freue sich de Lückcher, dat mer widder Kölsch hüüre kann.

Beim Ströppche-Klaaf weede Kindergäade besök.
Dä Püütcher Kölsch nohzobrenge mer hee versök.
Dr „Tuppess“ un dr „Mäthes“ sin immer dobei,
die zwei Poppe maache de Pänz för de Kölsche Sproch offe un frei.

„Freud die mer gevve, geht en et eigene Hätz eren“ steiht op der Fahn.
Unger däm Motto deit dat Schmölze „Verzällcher“ sing Arbeit dann.
De Metgledder besöke de Seniore aan zig Däg em Johr,
die hüüre Rümmer un Verzällcher, singe Leeder, alles op Kölsch, dat es klor.

Bei dä Wanderunge liert mer Kölle un et Ömland kenne.
Av un aan einem dobei de Föös ärg brenne.
Ungerwähs weed Kölsch geschwaad, e bessche gesüffelt un gemüffel en dr Puus.
Die Toure ende mies en nem schöne Bräues un dann geht et glücklich noh huus.

De Föhrunge sin villfäldig, denn Kölle bruch sich nit zo verstecke.
Dom, Stadt Anzeiger, Wasserwerk un sugar dr Süner kunnt mer dobei entdecke.
Mer wor och ens en Rhöndorf em Adenauer-Huus en dr Nöh vun dr Drachehöhl,
e ander Mol wor et de Usstellung vum Miro em Max Ernst Museum en Bröhl.

Dr Stammdesch es ganz neu, hät sich eets zweimol getroffe.
Mer hat vill Freud un mer kann jetz hoffe,
dat hä baal widder em nöchste Veedel weed tage,
wo dat sin weed, deit mer üch dann ziggig sage.

Dat Chor-Schmölzche deit kölsche Leeder singe.
Sugar mihstimmig dun die Stöckcher erklinge.
Un wann mer hüürt aale un neue Leeder,
dann wipp un schunkelt ungeloge jeder.
Mer nimmp sich geföhlvoll en dr Ärm
un öm et Hätz weed et einem ganz wärm.

Glich weed dat Chor-Schmölzche-Leed gesunge,
ich hoffe, dr Funke för de Fründe es üvvergesprunge.
Ich hüür jetz op met mingem Schwaade.
Dot mem Beitredd en dr Verein nit lang waade.